

**PLATAFORMA NASIONAL BESI TIMOR-LESTE
(PN-BESI-TL)**

 plataformanasionalbesitl@gmail.com

 +670 77235698/77631409

 Plataforma Nasional Besi Timor-Leste

 Rua, Como Kampung Baru-Dili

 <http://pnbesitl2019.blogspot.com>

Steering Committee – Co.Koko Valentin



**BESI Ba Ema Hotu,
Fatin Hotu !**

No: /KS.PN/I/PNBESI TL/10/2020

**Karta Submisaun
PN-BESI TL ba Asuntu Bee, Saneamentu no Ijiene (BESI)
Ba Orsamentu Geral Estadu (OGE) 2020 - 2021**

Introdusaun

Plataforma Nasional Bee, Saneamentu no Ijiéne Timor-Leste (PN-BESI TL) ne'ebé estabelese iha loron 14 Marsu 2014, nudár rede ne'ebé foku ba servisu advokásia hodi asegura povu hotu bele asesu ba Bee, Saneamentu no edukasaun Ijiéne ba komunidade. Servisu importante sira ne'ebé PN-BESITL halo ona maka hanesan halo peskiza no análise krítiku hodi promove transparénsia no akuntabilidade ba fornesimentu públiku liu husi instituisaun públiku, sosiedade sivíl no setór privadu iha setór Bee, Saneamentu no Ijiéne. Haforsa kampaña konsensializaun público liu husi promove partisipasaun povu iha prosesu dezenvolvimentu no sai na'in ba dezenvolvimentu liului ba setor bee, saneamentu no ijiéne hanesan nesesidade baziku. Nune'e, PN-BESI TL kontinua husu ba governu no entidades relevantes sira hodi hare ba asuntu ba haforsa implementasaun enkuadramento legál sira, hasa'e investimentu rekursu finanseira no haforsa servisu fornesimentu pubbliku sira ne'ebé ho kualidade no transparénsia.

Rekoñesimentu Diretu ba Bee no Saneamentu

Bee ho saneamentu rekoñese nu'udar direitus umanus ofisiálmente iha 2010 husi Asembleia Jerál ONU, nune'e mós konsidera iha konvensaun Inte rnasionál kona-ba Direitu Ekonomia, Sosiál no Kulturál nian katak Asesu ba bee moos, nu'udar direitu ema nian - direitu ba moris. Hanesan Direitus Umanus estadu iha devér hodi respeita, proteje no halo tuir. Fornesimentu bee moos no saneamentu ba komunidade sira, tenke sai prioridade aas, tanba aléinde garante iha nível internasionál, direitu ida ne'e mós garante ona iha Lei no políтика sira nasaun nian. Konstituisaun Repúblika Demokrátika Timor-Leste (artigu 6, versíkulu (e) no (f); artigu 57 versíkulu (1); no artigu 61), Dekretu Lei número 4/2004 kona-ba abastesimentu bee ba konsumu público, Políтика Saneamentu Báziku no políтика sira mak foin daudauk aprova hanesan políтика abastesimentu bee no políтика rekursu bee. Atu realiza direitu sira ne'e governu Timor-Leste hatuur ona iha Planu Estratégiku Dezenvolvimentu Nasional 2011-2030 no aliña ona ho Objetivu Dezenvolvimentu Sustentável (ODS No. 6) ne'ebé ninia finalidade mak to'o 2030, Timor-oan hotu-hotu sei asesu bee moos seguru no melloradu iha saneamentu.

Kontextu Kobertura Bee, Saneamentu no Ijiene iha Timor-Leste

Dadus Joint Monitoring Program (JMP) tinan 2019, hateten katak kobertura bee iha territóriu Timor-Leste tomak, asesu ba bee moos báziku kobre ona **78%**. Nune'e mós kobertura ba saneamentu báziku iha territóriu Timor-Leste nian, kobre ona **54%** no Kobertura ijiene báziku iha Timor-Leste nia laran tomak atinje ona **28%**. Husi dadus ida ne'e hatudu katak presiza esforsu maka'as liu tan hodi hasa'e kobertura ba atinje 100%.

Husi Observasaun Plataforma Nasional ba Bee, Saneamentu no Ijiene Timor-Leste - (PN-BESITL)

- Iha territóriu Timor laran tomak bee, saneamentu no ijiene sei sai preokupasaun aas tebes. Komunidade iha area rural sira sei ba kuru bee iha fatin dook (**30%**), feto no ema ho defisiénsia sira difisil tebes atu asesu ba fatin dook, feto no labarik sira sofre tanba tenke la'o dook, hikis kosar no todan antes lori bee to uma. Iha eskola sira falta fasilitade bee, saneamentu no ijiene, afeta ba labarik sira la tama eskola liu-liu labarik feto sira tanba laiha bee no hariis fatin adekuadu ba sira, iha ospitál no klínika sira laiha bee, saneamentu no fasilitade fase liman atraza ba pesoál saúde sira hodi halo tratamentu ijiene ba pasiente liu-liu inan isin rua sira no labarik.
- Iha parte setór bee, Saneamentu no ijiene (BESI) nian, ami observa katak Ministériu das Obras Públika, Ministériu Edukasaun, Ministériu saúde, Ministériu Administrasaun Estatal no Ministériu Planeamentu Estratégiku, Sekretáriu Estadu Ambiente mak iha relasaun servisu iha BESI maibé seidauk investimento mak signifikadu husi ministériu hodi hasa'e investimento (tuir relatório Lao Hamutuk 1% de'it ba bee no saneamentu iha 2019).
- PN-BESITL ninia observasaun nota katak seidauk iha integrasaun servisu BESI iha setór jéneru no inkluzaun sosial.
- PN-BESITL ninia observasaun mós nota katak seidauk iha rekursu umanus ne'ebé adekuadu tantu kuantidade no kualidade ne'ebé natoon hodi responde ba servisu setór BESI nian inklui kapasidade ezekusaun orsamentu.
- PN-BESITL nota katak governu depende liu ba doadór husi li'ur no garante deve atu finansia ba setór bee no saneamentu, Doadór mai ba tempu badak atu implementa projetu ne'ebé espesífiku, maibé ne'e la'ós dalan sustentável ka longu prazu atu jere setór bee no saneamentu, nune'e mós deve, governu presiza halo planu investimento ne'ebé longu prazu no inklui kustu manutensaun ba futuru.

Rekomendasaun Sira

- Husu Parlamentu Nasional atu analiza ba orsamentu jerál do estadu 2021, no dudu governu hodi hasa'e orsamentu ba bee saneamentu no ijiene nian 5% ba ministériu relevante sira. Aumentu orsamentu la'ós de'it ba konstrusaun fíziku maibé ba dezenvolvimentu rekursu umanus, kestaun asesibilidade, sensitivu jéneru, promosaun sira iha komunidade no operaun no manutensaun ba dezenvolvimentu BESI iha rural inklui mós halo konservasaun ba Bee matan sira.
- Husu ba Parlamentu Nasional atu husu governu bele esplika kona-ba transformasaun DGGAS ba empreza públiku hodi asegura la halo susar ba povu kbiit laek ba selu bee.
- Husu Parlamentu Nasional, atu fó hanoin ba governu hodi hametin servisu interligadu pertinente tebes hodi hadi'a prestasaun servisu mak di'ak liu.

Konkluaun

Rekoñese katak Bee saneamentu no Ijiene hanesan direitu báziku ne'ebé presiza hetan atensaun sériu hodi garante asesu bee no saneamentu ba ema hotu ho asesivel, suficiente, kualidade no sustentável. Ami mós hanoin katak la asesu bee ne'ebé di'ak hanesan fatór ida ba hamosu konflitu, violénsia doméstika, kontribui ba problema malnutrisaun no la suporta iha promosaun saúde ba inan no labarik sira. Nune'e, Ami husu katak rekomendasaun sira ne'e, sei bele ajuda ukun Na'in sira hodi halo revizaun nesesáriu iha proposta orsamentu jerál estadu ba setór Bee Moos, Saneamentu no Ijiene.

Prepara husi:

*Koko Valentín,
Koordenador SC PN-BESITL*

Organizaun Membru:

ETADEP, BIA HULA, AMAR, TUNA MUTIN, TIMOR VISION, SOHA FITUN, FHTL, Fundasaun Hamahan, HIM, Permatil, Fundasaun Loro-Leon, NTF, BMW no HealthNet Timor Leste, LbF, FE, GFFTL, RHTO HAK no Apilmentec